



La surdada dal premi entras Pascale Bruderer Wyss, la cussegliera dals chantuns e president da la giuria, in mument emozional per ils hoteliers grischuns.

Di da festa per ils hoteliers grischuns

Premi «Watt d'Or» 2015

DA GION NUTEGN STGIER / ANR

■ **Be fatschas cuntentas tar la delegaziun grischuna tar la surdada dals premis «Watt d'Or» 2015 a Berna. Quel da la categoria societad han retschet ils hoteliers grischuns per lur project da reducir il consum ed ils custs d'energia en lur manaschis.** Envidà a l'occurranza da gala en il «Kursaal» a Berna aveva l'Uffizi federal d'energia e da la partida en stadas 700 persunas. Tranter la societad illustra cunzunt er blera prominenzia da la politica e da l'economia federala, chantunala e regiunala. Preschenta era dentant er ina pli gronda delegaziun grischuna e quai cun buna raschun. In dals tsching premis che la confederaziun ha surdà quella saira han retschet l'antier hotelier *Gustav Lorenz* e *Hotelleriesuisse Grischun* per lur project «Tur da signals-hotels cun effizienz energetica Grischun». En il fratemp ha quel project fatg scola era sur ils cunfins da noss chantun, cun er hotels dad autras regiuns installar indrizs da stgaur spezial per reducir fin 15% il consum ed ils custs d'energia.

Grond interess medial

L'energia è oz natiralmain in dals temas principals tar ils meds da massa ed

uschia è er l'interess per la surdada dals premis «Watt d'Or» 2015 stà immens grond. Cunzunt per il project grischun è l'interess stà il pli grond cun emetter la «Tagesschau» sin SRF 1 ina contribuziun da passa duas minutas ed er il Telesguard ha rapportà sur dal premi per ils hoteliers grischuns. «Per nus è quai ina gronda onur che la Televisiun Svizra ha emess ina contribuziun da noss project e quai la saira durant il meglier temp d'emissiu», ha ditg *Ernst Wyrsch*, il president da *Hotelleriesuisse Grischun*. Cun rapportar ils meds da massa savens negativ da la hotellaria svizra ed er da la grischuna saja ina contribuziun positiva en la Tagesschau en vair senn in fatg plaschivel. *Ernst Wyrsch* è er stà losch che tants represchentants da divers manaschis impurtants ed uffizis dal chantun Grischun han accompagnà la delegaziun dals hoteliers grischuns a Berna per assister a la surdada dal premi «Watt d'Or» 2015. «Jau stim fitg quai e grond plaschier hai jau cunzunt da la preschientscha dal directur da la Banca chantunala, *Alois Vinzens*», ha ditg *Ernst Wyrsch*. «Nus avain era sustegnì quel project ed jau sun i cun plaschier ed onur a Berna a la surdada da quel premi», ha accentuà *Alois Vinzens*.

Reacziuns da l'entira Svizra

Losch da quel premi è en spezial *Gustav Lorenz*, l'antier hotelier ed iniziand principal dal project «Tur da signals-hotels cun effizienz energetica Grischun». Sia lavur è uss a fin cun far part da ses project bunamain 100 manaschis, cunzunt hotels, che han gia installà novs indrizs da stgaur spezial ubain vegnan anc a far quai en l'avegnir. Gratulaziuns da tuttas varts per quel premi ha lura er retschet *Andreas Züllig*, dapi diesch dis en uffizi sco president dals hoteliers svizzers ed in dals cuninziants dal project. Durant il viadi da Berna a Cuir ha el adina puspè survegnì «sms e mails» e quai betg mo da hoteliers da l'entira Svizra, mabain er da numerus giasts. Inchantà è il hotelier da Lai cunzunt che quel project ha fatg in uschè grond svilup sunter ina fasa iniziata tut auter che empermettent. In um che è s'engaschè ferm per quel project è er stà *Jürg Domenig*, il mainagestiu da *Hotelleriesuisse Grischun*. Dapi il premi «Milestone» saja il premi «Watt d'Or» gia la segunda undrientscha per quel project e conferma uschia che *Hotelleriesuisse Grischun* saja i la dretga via cun lantschar il project per reducir custs e consum d'energia en ils hotels.



Ina gronda delegaziun dal Grischun è stada da la partida tar la surdada dal premi en il «Kursaal» a Berna.



In discurs tranter experts d'energia: Pascale Bruderer Wyss e Gallus Cadonau.



Dumeni Columberg en discussiun cun Daniela Decurtins, uriunda da Trun, commembra da la giuria e directura da l'Associaziun svizra da gas.



Dus hoteliers da success cun il directur da la Banca chantunala: Claudio Dietrich, Felix Dietrich, «Waldhaus» Segl ed Alois Vinzens (da san.).



A la giuria appartegna er Stefan Cadosch (san.), l'architect surmiran e president dals architects svizzers.



Tegnan cun plaschier il premi: Daniel Schneider, cussegliaier d'energia e Corinne Denzler, directura «Tschuggen Group».